



# ŠKOVLÂRÁÁVHU kulluuttem 2018

Maht tun vaikuttiččih? Tiädáh-uv, ete mon stuorrâ vaikuttâs uccâ tavoin puáhtá leđe? Lah-uv tun kuássin smiettâm, ete moos puoh tun puávtáh vaikuttiđ?

Onne škovláráávhuh kulluutteh jo 28. keerdi. Taan ive teeman lii vaikuttem já tot, ete maht uccâ-uv tavoin puáhtá leđe stuorrâ vaikuttâs. Meid peivikiäjuh láá pividum mieli kulluuttiđ Peivikiäččuráávhuh.

Vaikuttemvyevih láá maangah. Kenski puoh uáppásumos vaikuttemvyehi lii masa jyehi škovlâst teikâ oppâlájádâsâst tuáimee uáppeekode stivrâ, mast puáhtá vaikuttiđ škovlâ siskáldâs aššijd.

Maangâin vyeliškovlâin láá faadâruáppeeh, kiáh išedeh uđđâ škovlâlijd škovlâ aalgâtmân lohtâseijee hástusijn. Faadâruáppeeh tuáimih meid roolimallin maingáid nuorâb uáppeid. Pajetâásist toorjâuáppeetoimâin puáhtá pyerediđ škovlâ makkuusvuodâ já vuoiñâ išseedmâin uđđâ uáppeid taibâđ škovlân. Nube täásist västideijee vaikuttemvyehi lii tutortoimâ.

Puohah iä veltihánnáa haalijd vyelgid fáárun vaikuttemtoimân návt stuorrâ tavoiguin. Kuittâg meid ubâ škovlâ pargei já luokkaskipárij uccâ tavoin lii stuorrâ vaikuttâs já ovdâmerkkân moje oovdeldpuáttei teikâ luokkaskippáar tiervâtem puáhtá toohâđ kiännii peeivist pyereeb.

Tast, ete ij kiivsed, lii puohâi skippáar já tuhhit juáhháa tagarin ko sun lii, lii stuorrâ merhâšume peivikiäju já škovlâ vuoiñân. Meid sosiaallii mediast puáhtá jyehiđ šiev mielâ já vaikuttiđ iärásij piáiván, veikâ nuuvt, ete kommentist nánnáht kiännii kován.

Taah puoh láá argâpeeivi vaikuttemvyevih, main ohtâgin ij lah tergâdub ko nubbe. Laiba tuu vaikuttemvyehi alguu toohâm teikâ moje, lii tuu taho tergâd.

**Tun puávtáh vaikuttiđ – Moje-uv išseed.**